

1. Ch'a yaa nasgáx áyú shaawát; Kinyeekookúkék yóo duwasáakw yú Yéil tláa ku.aa.
2. Du yátx'i áwé tle a.een wé du káakch, tle a.een, Yookis'kookék ku.a.
3. O-o-oh! Tle aaltien gáax.
4. Áwé yú taashukát hán Láx' áwé, yéi ash yawsikaa,
5. «Wáa sáwé tsú x'wayeeká, shaawát? »
6. «Ha yú ax éek' áwé Yookis'kookék yóo duwasáakw.
7. Áwé tle ax yádi áwé, tle yei axooxch, tle ash jákx, wé dáax.»
8. A jiyeet áyá yaa nxasgáx.
9. «Ch'a yaa kukgeelt'éetch; ch'a yaa kugatées'.
10. Tlax yéi kakoogék'i aa té ysateení, daa kdidugu yáx yateeyi aa, aax kei kgeetée tle kakgidatée.
11. Tle i lakaadé yiteeyí áwé kakgeenóot',wé té.»
12. Wáa sáwé awsiteen daa kdidugu téik' yéi kagugéink'.
13. Áwé tle aax akaawatee, tle akaawanóot' tle.
14. Tle akananóot' ásíwégé tle tle yátx du jee wsitee wé té, yátx.
15. Ách áwé Láx' du yéetx wusitee Yéil ku.aa.
16. Yéil éeshx wusitee Láx'.
17. Aatx kugastée áwé du yádi tle noow yáx gíwé wootee wé Yéil ku.aa, yá lingit'aaní awliyexi Yéil.
18. Aagáa áwé tle du éek' yéi ash yawsikaa, «Haat gagóot sáwé i yéet, ax dáaxi yíkdáx kinde at gas'óowu yú l'ooú.»
19. A yíx áwé yei kunas'úw tle, yan tadanóok áwé a yíx' tle a taka.ádi a kinde as'óowu áwé tle ash káa yaa kandax'áx'w tle.
20. Tle ash káa yaa kandatúli tín áwé, tle yóo aawat'íy tle.
21. Awut'éeyi, awut'éeyi áwé, tle wóoshdáx wudigáat, wé dáax.

22. «Haa! Wáa sáwé tsú yéi ysinéi? »
23. «Ha, ch'a xá kaawawál'. »
24. «Haa, yóode nagú yú aas!
25. Yóox daak uwa.áa aas déix, nalgeech aadax! »
26. Tle át uwagút.
27. Tle gaxóot'i áwé tle yá a yík ásíwé ín áwu wé aas.
28. Hé! Tle du daadax áwé kask'óot, wé ín yú axóot'i wé aas.
29. Ch'a yák'w áwé hú tle kei awligích.
30. «É! » X'áan áwé du too yéi woonei, Yookis'kookéik ku.aa.
31. «Yú,yú x'aa tooúw á náakw, aadé nagú!
32. Aagáa aadax daaklak'éix'! »
33. tle yóo ash yawsikaa.
34. Tle awlis'óow wé yóo ksatan.aa k'ix'aa yax kasatan.aa wé aas, sheey, aasyádi, aasyádi áwé awlis'óow.
35. Tle a x'awoolt wugoodí áwé, yéi ayawsikaa wé náakw: «Sh kageelhá, náakw! Sh kageelhá! Sh kageelhá! »
36. Tle yéi áwé gawsigéink', wé náakw, tle ashaawak'éx'.
37. Tle daak awulkéet'i, tle yá du xiksháax áwé ayawsigeex', tle yú du káak hídidé.
38. Tle héide ashuwutaaní áwé tle anax neil aawaxích.
39. «Sh neelwáat! Sh neelwáat, ch'a náakw! »
40. Tle aadé neil awuxeejí teen áwé, yaa shanahík wé du hídi du een áwé.
41. «He-e-e-eh! Haagú! Haagú! Gáande nastí! Gáande nastí wé náakw! »
42. «Ha, ch'a l ch'a eexoox kát! »
43. «Gáande nastí! Tlel ax tuwáa ushgú. »
44. A yís x'áant uwanúkw wé du kéilk'.

45. Áwé tle yéi ayawsikaa áwé k̲wa: «Néi! Ch'a k̲ées'! Gunayéi ikadá! Gunayéi ikadá ch'a k̲ees'!
46. «Néi! K̲ées'! Ch'a tliyéix' s'é yan ikadá! Ch'a tliyéix' s'é yan ikadá!» yóo ayawsikaa.
47. Ch'a ayáx̲ áwé tliyéi yéi wootee wé k̲ées'.
48. Tle tláakw áwé yú du tláa x̲án.
49. «Atlée! Shakgwatl'éet' yá lingit'aaní!
50. Haagú!
51. Yá gáaxw toox̲ daak̲ gú! Yá gáaxw doogú toox̲ daak̲ gú!»
52. A yáx̲ áwé tle a toox̲ áwé daak̲ uwagút wé gáaxw doogú.
53. «Ch'a yá lingit'aaní kát igux̲latéet. Tléil wáa sá ikgwanei,» yóo ayawsikaa.
54. Aagáa áwé tsu tle áa k̲ux̲ wudigút, yan asnéi k'idéin.
55. Aagáa áwé tle gunayéi kaawadáa wé k̲ees'.
56. Tle yá lingit'aaní áwé yaa shanatl'ít'.
57. L aadé n̲ax̲wdzigeedi yé h́u k̲u.aa, wé Yéil.
58. «Wáa sá ushgé k̲ux̲waanóok?»
59. Wáa nanéi sáwé yóo tuwditaan, «Xáats't k̲adakeení,» yóo tuwditaan.
- 60.
61. «Xáats't k̲adakeen.»
62. Tle wdakeení áwé, kindachóon, ei-ei-ei-ei-ei, tle yú xáats'de áwé wdikeen, yá du lú áwé tle a tooode yéi woonéi, wé xáats' tooode.
63. Ách áwé wooyíkt áwé wligeik̲ h́u k̲u.aa.
1. Shaawatl'ít yá lingit'aaní tle.